



ATASSUT

UPA14/132-1

Gerhardt Petersen

26.03.2014

Siunnersuut uunga: Inatsisartut inatsisaat nr. xx ulloq xx xxxx Aatsitassat pillugit ingerlatallu tamatumunnga pingaarutillit pillugit inatsisartut inatsisaannut nr. 7, 7. december 2009- immersoq allannguutissamut tunngasoq (aatsitassat pillugit inatsit)
(Inuussutissarsiornermut Aatsitassanullu Naalakkersuisoq)

Aatsitassat pillugit Inatsisartut inatsisaata allangortinneqarnissaa pillugu inatsisissatut siunnersuut ATASSUT-mit imaattumik oqaaseqarfigissavarput:

Siunnersuut manna akuersaarneqarpat apeqqutini aatsitassarsiornermut tunngassuteqartuni innuttaasut periarfissaqartinneqarlualutik qisuariarnissaminnut periarfissaat pioreersut inatsisitigut ersarissumik sinaakkutaqartinneqalissapput, tamannalu ATASSUT-mit iluarisimaarparput.

Qularutissaanngilaq innuttaasut ataasiakkaat aammalu soqutigisaqaqatigiikkaat aatsitassarsiorsinnaanermik soqutiginnittoqaliinnartorli qisuariarsinnaanissaminnut aammalu suliaasaqarfiup iluani aalajangiisoqarnissaa sioqqullugu ilisimatuunik misissuisitserusussagunik misissuisitsinissaminnut aningaasanik qinnuteqarsinnaatitaalernissaat tamat oqartussaaqataanerannut nukittorsaataassasoq.

ATASSUT-mit ilisimaaraarput Inatsisartuni illuatungiliuttut oqaasinnaarigaat “aalajangeeriarluni innuttaasut tusarniarneqarnerat killormoorpoq”. Taamatut oqartarnermi pineqartoq tassaavoq aatsitassanik uranitalinnik attueqqusinngilluinnarnerup peerneqarsimanera.

ATASSUT-mit tamat oqartussaaqataanerat tunngavigalugu aalajangiinerit tamaasa ataqquilluinnarpagut, matumani aamma attueqqusinnginnissamik atorunnaarsitsineq qinikkat akunnerminni oqallisigeriarlugu aalajangiinerat ilanngullugu.

Tassuunakkut aamma ersiutaamat Naalakkersuisooqatigiit isumaqatigiissutaat tigussaasuusumik atuutsinneqartoq, tassalu innuttaasunut ammasumik aqutseriaaseqarnerunissaq.



ATASSUT INATSISARTUNI

ATASSUT-mit iluarisimaarparput innuttaasunik paasisitsiniaasarnernik, oqallitsitsisarnernik aammalu tusarniaasarnernik ataqatigiissaakkamik inatsisitigullu sinaakkutarissaartumik Naalackersuisut aqutissiuussiniarmata, taamaattorli aamma siunnersuut sukumiisumik peqqissaartumillu nalilersorneqarsinnaaqullugu Aatsitassanut Ataatsimiititaliamut siunnersuut suliassanngortinneqassasoq inassutigissavarput.